

Meteo: No tin alerta di tsunami pa Aruba

Un terremoto magnitud 7.6 a sacudi Lama Caribe, sur di Cayman Islands riba diasabra, segun US Geological Survey. Varios isla y pais a urgi hende cerca di e costa pa move den e pais, pero autoridadnan na mayoria di pais despues a elimina e alerta di tsunami.

E terremoto a tuma lugar pa 6:23pm ora local memey di lama, y tabatin un profundidad di 10km, USGS a bisa. Su epicentro tabata ubica 209km sur-suroccidente di George Town den Cayman Islands.

Merca a emiti alerta di tsunami pa Puerto Rico y US Virgin Islands, pero despues a cancela esaki.

Cayman Islands su maneho di emergencia a urgi residentenan move na mayor altura, pero despues a emiti un “all


clear” riba su pagina di Facebook.

Gobernador di Puerto Rico, Jenniffer Gonzalez Colon a bisa den un declaracion cu e ta den contacto cu agencianan di emergencia despues di e advertencia pa tsunami, pero no a recomenda pa hende bandona e costa.

Gobierno di Republica Dominicana tambe a emiti un alerta pa tsunami y a recomenda residentenan den costa pa move na mayor altura, pero despues a cancela e alerta.

Autoridadnan Hondureño y gobierno Cubano a urgi hende pa keda leu di beach.

Mientras tanto, servicio meteorologico di Aruba, Meteo a informa riba su pagina di Facebook cu no tabatin alerta di tsunami pa Aruba, desmintiendo informacion cu tabata circulando riba rednan social.



Mayor ta trece dilanti su preocupacion pa un situacion involucrando un maestro di Colegio Arubano cu a mishi cu un alumno indebidamente

Recientemente na nos mesa di redaccion a yega informacion di forma anonimo di parti di un mayor preocupa pa un situacion na Colegio Arubano. Segun e informacion ta trata di un caso cu ta envolver un maestro cu lo a “fula” un estudiante di e scol y ainda ta trahando na e scol.

A traves di varios email anonimo u mayor di un estudiante na Colegio Arubano a expresa su preocupacion pa un situacion involucrando un meneer di e scol cu supuestamente lo mester a mishi cu un estudiante menor di edad di un forma no adecua.

Informacion inicial cu a drenta cerca Bon Dia Aruba dia 30 di januari a indica cu tin un situacion na Colegio Arubano cu tin un mayor preocupa. E mayor aki, ken no a revela su identidad y a keda completamente anonimo pa bienestar di su famia, a splica cu tin un maestro di idioma na e scol cu den parada di fakkel (carnaval) a mishi y fula un alumno menor di edad.

Segun e mayor a indica scol ta na altura di e situacion aki y e meneer no a bin traha den e siman despues cu tabata e siman di examen. E siguiente siman e meneer tabata back na trabou locual ta preocupa

e mayor aki.

“Niun momento a haci algo pa defende nos muchanan. Mañan e meneer aki por mishi cu mi yiu, kico e ora?” el a cuestiona.

El a sigui indica den su mail cu e no ta sinti cu e por acerca e school, pa no perhudica su yiu, y cu ta muestra manera cu e rector di e scol no ta haci nada.

“Con por ta posibel cu un maestro por mishi (fula) cu un menor di edad den pleno carnaval. Tur hende ta keto y no por haci nada. Mi a comprende di otro mayor, cu e pensamiento ta cu e rector ta permiti e bagabunderia aki na scol. Nos tin un problema grandi na scol y mi no tin alternativa pa hiba mi yiu otro scol,” e mayor a splica.

Dia 5 di februari otro email a drenta di forma completamente anonimo caminda cu a bolbe expresa nan frustracion y preocupacion pa con e situacion a ser maneha y e hecho cu e meneer aki ainda ta traha na scol.

E mayor a informa cu e maestro, ken ta un maestro di Papiamentu na Colegio Arubano di inicialnan B.F., ainda ta traha na Colegio Arubano. El a cuestiona dicon e maestro aki ainda por sigui duna les, teniendo na cuenta e situacion cu a tuma luga.

E mayor a indica tambe cu e stichting cu ta maneha e scol, SMOA, a dicidi di lage na trabou y esaki tin e maestronan ta preocupa y no por haci nada, y, segun e mayor a señala, nan tin miedo di e stichting tambe.

El a agrega cu dentro di poco alumnonan di Colegio Arubano lo ta biahando pa Hulanda y e mesun meneer aki ta forma parti tambe di e grupo cu lo ta biahando. Esaki ta haci cu e preocupacion y desconfiansa ta crece.

“Mi yiu tambe ta participa y mi no ta confia e homber aki cerca di mi yiu. Con por ta posibel cu maestronan por mishi y fula un estudiante y no tin consecuencia pa esaki. Un menor di edad cu por ta insigur y ainda mester cosose mundo ta wordo manipula y abusa. Un scol tin e deber di sali na vanguardia di nos yunan y no por ta defende un maestro cu tin prueba di cu el a mishi cu un mucha,” e mayor aki a remarca.

Bon Dia Aruba a tuma contacto cu SMOA y representante di e stichting a splica cu e suceso ta uno cu a tuma luga pafo di scol a pesar cu e meneer ta un masetro y tin un alumno meerderjarig involvi, na e momento cu e situacion a presenta e organizacion a schors e maestro pa



tres dia y despues di a haci tur e investigacion necesario a dunele un warning mara na un sancion cu ta contene kico ta e medidanan cu lo ser tuma si e no tene su mes na e reglanan cu mester tene na dje.

E mayor preocupa ta cuestiona con por ta posibel cu ta laga un maestro keda traha na scol despues di mishi cu un alumno na un manera no adecua. SMOA a splica cu den nan investigacion nan ta mira e balansa y con e cosnan tabata na ambos banda.

E stichting a indica cu a base di e investigacion cu nan a realisa, a sali na cla cu aparentemente pafo di scol caba ta trata di un grupo di amigo cu a dicidi pa bay e parada en cuestion hunto.

Di parti di e stichting a agrega cu nan a papia cu e maestro ya subraya e importancia di tin limitenan y un standrad di comportacion cu como maestro mester atene na dje, hasta pafo di scol. E stichting a enfatisa cu bou

di ningun circunstancia nan ta permiti esey sucede y pa e motibo ey, basa riba e resultadonan di e investigacion, a tuma e medidanan cu nan a mira ta necesario.

Na mesun momento SMOA a subraya cu ta nan ta haya lamnetable cu e mayor preocupa no a acudi cu su preocupacion na e stichting pa asina por splica kico ta loke nan a encontra den nan investigacion y pa ki motibo a tuma e decision cu a tuma.

Bon Dia Aruba a puntra e fundacion den caso di e maestro cu lo mester ta biahando pronto cu un grupo di estudiante pa Hulanda, si esaki ta bay sucede teniendo na cuenta e situacion cu a tuma luga. E stichting a indica cu e decision aki ta cay bou di e scol y e comision encarga cu e biahe.

Bon Dia Aruba a purba tuma contacto cu Colegio Arubano via telefon pero no a logra haya un contesta.